

TARIKH	27 / 5 / 2013	SEKSYEN	Negara
MUKA SURAT	5	RUANGAN	

Malaysia mohon kuota tambahan

NORLIDA AKMAR IDROS

YAN – Kerajaan tidak pernah berhenti daripada membuat rayuan kepada pihak berkuasa Arab Saudi agar kuota mengerjakan haji bagi penganut Islam dari Malaysia ditambah setiap tahun.

Menteri di Jabatan Perdana Menteri, Datuk Seri Jamil Khir Baharom berkata, buat masa ini, kuota haji Malaysia hanya 28,000 orang dan memohon agar ditambah 10,000 orang lagi.

“Setiap tahun kita membuat rayuan dan kelulusan permohonan penambahan kuota hanya diketahui pada saat-saat akhir selain bergantung kepada faktor keadaan semasa.

“Kali ini kita minta tambahan 10,000 orang dan kita meminta bantuan Perdana Menteri, Da-

tuk Seri Najib Tun Razak yang mempunyai hubungan baik dengan Raja Arab Saudi agar kuota tambahan ini diluluskan,” katanya selepas menghadiri majlis kenduri kesyukuran di rumah Setiausaha Lembaga Tadbir Sekolah Agama Taufikiah Khairiah Al-Halimiah yang lebih dikenali sebagai Pondok Pak Ya, Mohd. Najib Fahami Yahaya di sini semalam.

Jamil Khir baru-baru ini memberitahu, sebanyak sejuta penganut Islam di negara ini berada dalam senarai menunggu untuk mengerjakan haji berikutan kuota yang ditetapkan oleh Kerajaan Arab Saudi hanya 28,000 orang.

Menurut beliau, kuota jemaah

haji bagi sesebuah negara ditetapkan oleh Pertubuhan Kerjasama Islam iaitu sebanyak 0.1 peratus daripada jumlah penduduk negara terbabit.

Dalam perkembangan lain, kata Jamil Khir, banyak negara luar mengguna pakai sistem pengurusan haji oleh Lembaga Tabung Haji (Tabung Haji) sebagai model pengurusan jemaah haji di negara mereka.

“Namun, terdapat sedikit kekangan dalam menjayakannya kerana di Malaysia ada Akta Pengurusan Haji dan Tabung Haji, ini membezakan Malaysia dengan negara lain.

“Begitu juga model Tabung Haji, jika tidak diadakan secara bersama dengan kerajaan, ia sukar untuk dilaksanakan de-

ngan sebaik-baiknya,” katanya.



JAMIL KHIR (dua dari kanan) berbual dengan penduduk pada majlis kenduri kesyukuran di rumah Setiausaha Lembaga Tadbir Sekolah Agama Taufikiah Khairiah Al-Halimiah di Yan semalam.